

四庫全書

史部

欽定四庫全書

史部

兩漢博聞卷

三四

詳校官編修<sub>臣</sub>李潢

侍讀<sub>臣</sub>孫球覆勘

總校官庶吉士<sub>臣</sub>何思鈞

校對官庶子<sub>臣</sub>鄒奕孝

謄錄監生<sub>臣</sub>朱續曾

欽定四庫全書

兩漢博聞卷三

宋 楊侃 輯

更有三品

昭帝紀元鳳四年

食貨志四上

如淳曰更有三品有卒更有踐更有過更古者正卒無常人皆當迭為之一月一更是為卒更貧者欲得顧更錢者次直者出錢顧之月二千是謂踐更也天下之人皆直戍邊三日亦名為更律所謂

繇戍也雖丞相子亦在戍邊之調不可人人自行  
三日戍又行者當自戍三日不可往便還因使住  
一歲一更諸不行者出錢三百入官官以給戍者  
是為過更也律說卒踐更者居也居更縣中五月  
乃更也後從尉律卒踐更一月休十一月也食貨  
志曰月為更卒已復為正一歲屯戍一歲力役三十  
倍於古此漢初因秦法而行之也後遂改易有謫乃  
戍邊一歲耳更音工衡反又食貨志注師古曰更卒

謂給郡縣一月而更者也正卒謂給中都官者也率計今人一歲之中屯戍及力役之事三十倍多於古也

暴室

宣帝紀

後漢桓帝鄧皇后傳

掖庭令張賀嘗事戾太子思顧舊恩哀曾孫奉養甚謹為取暴室嗇夫許廣漢女

師古曰暴室者掖庭主織作染練之署故為之暴室取暴曬為名耳或云薄室者薄亦暴也今俗語亦云薄曬蓋暴室職務既多因為置獄主治其罪

人故往往云暴室獄耳然本非獄名嗇夫者暴室屬官亦猶縣鄉之嗇夫也

注云漢官儀曰暴室主宮中婦人疾病者其皇后貴人亦就此室

中二千石

宣帝紀神爵四年

黃霸以治行尤異秩中二千石

師古曰霸舊已二千石矣今增為中二千石以寵異之此與地節三年增膠東相王成秩其事同耳

漢制秩二千石者一歲得一千四百四十石實不滿二千石也其云中二千石者一歲得二千一百六十石舉成數言之故曰中二千石中者滿也

佐酒

高帝紀十二年

上置酒沛宮悉召故人父老子弟佐酒

應劭曰助行酒

張飲

高帝紀

上過沛留止張飲三日

張晏曰張帷帳也張音竹亮反

駃騠

鄒陽傳二十一

蘇秦相燕人惡之燕王燕王按劍而怒食以駃騠  
孟康曰駃騠駿馬也蘇秦雖有讒諂而更食以珍  
奇之味

擁彗

高帝紀六年

太公擁彗迎門卻行

李奇曰如今卒持帚也師古曰彗者所以埽也卻



退而行也彗音似歲反

復道

高帝紀

上居南宮從復道上

如淳曰復音複上下有道故謂之復

乘傳

高帝紀五年

田橫乘傳詣雒陽未至三十里自殺

如淳曰律四馬高足為置傳四馬中足為馳傳四馬下足為乘傳一馬二馬為軺傳急曰乘一乘傳

師古曰傳者若今之驛古者以車謂之傳車其後又單置馬謂之驛騎傳音張戀反

舍人

高帝紀

蘇林曰藺相如為宦者令舍人韓信為侯亦有舍人師古曰舍人親近左右之通稱也後遂以為私屬官號又曹參傳注曰舍人猶家人也一說私屬官主家事者也

宿兵

韓安國傳二十二

韓安國曰孝文皇帝嘗壹擁天下之精兵聚之廣武  
常谿然終無尺寸之功孝文寤於兵之不可宿故復  
合和親之約

師古曰宿久留也

柱國

高帝紀

應劭曰柱國上卿官也若相國矣

詭辯

趙王彭祖傳二十三

趙王彭祖為人心刻深好法持律詭辯以中人

師古曰詭辯違道之辯也中傷也

權會

趙王彭祖傳

趙王擅權使使即縣為賈人權會

韋昭曰平會兩家買賣之賈者權者禁他家獨王家得為之也師古曰即就也就諸縣而專權賈人之會若今和市矣會音工外反

一子不事

賈山傳二十一

賈山曰陛下即位振貧民禮高年九十者一子不事

八十者二算不事

師古曰一子不事蠲其賦役二算不事免二口之

算賦也

合從

項籍傳贊一

過秦論曰諸侯恐懼會盟而謀弱秦不愛珍器重寶  
肥饒之地以致天下之士合從締交相與為一

師古曰締結也從子容反締大系反

約從

從橫

項籍傳贊

後漢馮衍傳十八下

過秦論曰約從離橫

師古曰約誓為從欲以分離為橫橫謂秦也

馮衍顯志賦云毒從橫之敗俗

注云毒恨也關東為從關西為橫蘇秦事鬼谷先生為從說說關東六國為從親以畔秦會於洹水之上剗白馬而盟張儀與蘇秦同師為關西橫說說關西六國令事秦皆尚誣詐不遵道德

景從

項籍傳贊

天下雲合嚮應贏糧而景從

師古曰嚮讀曰響如響之應聲贏擔也景從言如影之隨形也

頭會箕斂

張耳傳二

頭會箕斂以供軍費

服虔曰吏到其家人人頭數出穀以箕斂之

同產子

平帝紀元始元年

平帝即位令諸侯王公列侯關內侯七子而有孫若

子同產子者皆得以為嗣

師古云子同產子者謂養昆弟之子為子者

縣官

東平王宇傳五十

東平王宇曰今縣官年少

張晏曰不敢指斥成帝謂之縣官也

渙汗

元帝永光四年

後漢胡廣傳三十四

詔曰政令多還民心未得

李奇曰還反也易曰渙汗其大號言王者發號施



令如汗出不可復反

胡廣曰政令如汗往而不反

郵亭

薛宣傳五十三

郵亭不修

師古曰郵行書之舍亦如今之驛及行道館舍也

左道

王商傳五十二

執左道以亂政

師古曰左道僻左之道謂不正

相訐 王商傳

父子相訐

師古曰訐告斥其罪也

輦鼓

史丹傳五十二

師古曰輦本騎上之鼓

流庸

昭帝紀

始元四年詔曰比歲不登民匱於食流庸未盡還

師古曰流庸謂去其本鄉而行為人庸作

傳馬

昭帝紀元鳳二年

張晏曰驛馬也

馬口錢

昭帝紀

元鳳二年詔曰其令郡國毋歛今年馬口錢

文穎曰往時有馬口出歛錢今省如淳曰所謂租及六畜也

緡錢

武帝紀元狩四年

李斐曰緡絲也以貫錢也一貫千錢出算二十也

師古曰謂有儲積錢者計其緡貫而稅之緡武巾

反

計帳

武帝紀

武帝元封五年明堂朝諸侯王列侯受郡國計

師古曰計若今之諸州計帳也

占租

昭帝紀

始元六年令民得以律占租

如淳曰律諸當占租者家長身各以其物占占不

以實家長不身自書皆罰金二斤沒入所不自占  
物及賈錢縣官也師古曰占謂自隱度其實定其  
辭也占章贍反下又言占名數其義並同今猶謂  
獄訟之辨曰占皆其意也蓋武帝時賦歛繁多律  
外而取今始復舊

倉廩

昭帝紀元鳳三年

師古曰倉新穀所藏也廩穀所振入也

長楊五柞

宣帝紀

武帝疾往來長楊五柞宮

師古曰長楊五柞二宮並在盤屋皆以樹名也

橋虔吏

武帝紀元狩六年

師古曰橋與矯同其字從手矯託也虔固也妄託上命而堅固為邪惡也

侵漁

宣帝紀神爵三年

侵漁百姓

師古云漁者若言漁獵也

絕幕

武帝紀元朔六年

衛青復將六將軍絕幕

應劭曰幕沙幕匈奴之南界也臣瓚曰沙土曰幕  
直渡曰絕師古曰幕者即今之突厥中磧耳

柏梁臺

武帝紀元鼎二年

師古曰三輔舊事云以香柏為之今書字皆從柏

火耕水耨

武帝紀

江南之地火耕水耨

應劭曰燒草下水種稻草與稻並生高七八寸因  
悉芟去復下水灌之草死獨稻長所謂火耕水耨  
泛駕之馬

武帝紀元封五年

師古曰泛覆也音方勇反字本作芟後通用耳覆  
駕者言馬有逸氣而不循軌轍也

跣弛

武帝紀

跣弛之士

如淳曰士行有卓異不入俗檢而見斥逐者也師



古曰跖者跖落無檢局也弛者放廢不遵禮度也  
跖土各反弛式爾反

典屬國

昭帝紀始元六年

蘇武前使匈奴留單于庭十九歲迺還奉使全節以  
武為典屬國

如淳曰以其久在外國知邊事故令典主諸屬國  
師古曰典屬國本秦官漢因之掌歸義蠻夷屬官  
有九譯令後省并大鴻臚

水衡錢

宣帝紀

本始二年以水衡錢為平陵徙民起第宅

應劭曰水衡與少府皆天子私藏耳縣官公作當  
仰給司農今出水衡錢言宣帝即位為異政也

健仔

昭帝紀

師古曰健接幸也仔美貌也故以名宮中婦官字

或從女音接余

便殿

武帝紀建元六年

師古曰凡言便殿便室便坐者皆非正大之處所以就便安也

子大夫

武帝紀元光元年

師古曰子者人之嘉稱大夫舉官稱也志在優賢故謂之子大夫也

算商車

武帝紀

元光六年初算商車

李奇曰始稅商賈車船今出算

漕渠

武帝紀元光六年

穿漕渠通渭

如淳曰水轉運曰漕

不肖

武帝紀

師古曰肖似也不肖者言無所象類謂不材之人也

惡少年

昭帝紀元鳳五年

發三輔及郡國惡少年更有告劾亡者屯遼東

師古曰惡少年謂無賴子弟也被告劾而逃亡者

緩頰

高帝紀二年

漢王謂酈食其曰緩頰往說魏王豹

張晏曰緩頰徐言引譬喻也

間出

高帝紀三年

紀信曰事急矣臣請誑楚可以間出

師古曰間出投間隙私出若言間行微行耳紀信詐為漢王而王出西門遁是私出也

亢禮

高帝紀五年

師古曰亢當也高下相當無所卑屈不獨謂揖拜

也

案原注引應劭曰亢禮者長揖不拜故末句云然

三川

高帝紀

沛公與項羽西略地至雍丘與秦軍戰大敗之斬三

川守李由

應劭曰三川今河南郡也由李斯子也韋昭曰有

河洛伊故曰三川

銜枚

高帝紀

章邯夜銜枚擊項梁

師古曰銜枚者止言語謹囂欲令敵人不知其來也周官有銜枚氏枚狀如箸橫銜之

老弱傳籍

高帝紀二年

蕭何發關中老弱未傳者悉詣軍

服虔曰傳音附如淳曰今老弱未嘗傳者皆發之未二十三為弱過五十六為老師古曰傳著也言

著名籍給公家徭役也

甬道

高帝紀

漢王築甬道屬河以取敖倉粟

應劭曰恐敵鈔輜重故築垣牆如街巷也鄭氏曰甬音踊師古曰屬聯也之欲反

陛下

高帝紀五年

應劭曰陛下者升堂之陛下王者必有執兵陳於陛階之側羣臣與至尊言不敢指斥故呼在陛下者而



告之因卑以達尊之意也若今稱殿下閣下侍者  
執事皆此類也

三齊

田儉傳三

并三齊之地

師古曰齊及濟北膠東

苑囿

高帝紀

師古曰養鳥獸曰苑苑有垣曰囿所以種植謂之

園

酒闌

高帝紀

文穎曰闌言希也謂飲酒者半罷半在謂之闌

賜告

高帝紀

高祖嘗告歸之田

孟康曰古者名吏休假曰告漢律吏二千石有予告有賜告予告者在官有功最法所當得也賜告者病滿三月當免天子優賜其告使得帶印綬將官屬歸家治病師古曰告者請謁之言謂請休耳

或謂之謝謝亦告也左氏傳曰韓獻子告老禮記  
曰若不得謝漢書諸云謝病皆同義

繡衣直指

百官公卿表七上

侍御史有繡衣直指

服虔曰指事而行無阿私也師古曰衣以繡者尊  
寵之也

長揖

高帝紀

師古曰長揖者手自上而極下也

斬以徇

高帝紀

師古曰徇行示也司馬法曰斬以徇言使人將行

徧示衆士以為戒

宗臣

蕭曹傳贊

王莽傳六十九上

蕭曹位冠羣后聲施後世為一代之宗臣

師古曰言為後世之所尊仰故曰宗臣

法有祖

王莽傳

今大法有設後世有祖

案漢書今本俱作天法有設此作大法蓋猶宋時刊本之

舊

師古曰祖始也以此為法之始

較然

王莽傳

如此即羣下較然輸忠黎庶昭然感德

師古曰較明貌也

藉橐

元后傳六十八

車騎將軍音藉橐請罪

師古曰自坐橐上言就刑戮也

青瑣

元后傳

孟康曰以青畫戶邊鏤中天子制也師古曰青瑣者刻為連瑣文而青塗也

濯歌

元后傳

成都侯王商嘗病欲避暑從上借明光宮後又穿長安城引內澧水注第中大陂以行船立羽蓋張周帷輯濯越歌上幸商第見穿城引水意恨內銜之

師古曰輯與楫同濯與櫂同皆所以行船也今執

輯擢人為越歌也輯謂擢之短者也今吳越之人  
呼為撓音饒越歌為越之歌

奉常

百官公卿表七上

師古曰太常王者旌旗也畫日月焉王有大事則  
建以行禮官主奉持之故曰奉常也後改曰太常  
尊大之義也

期門

羽林

百官公卿表  
宣帝神爵元年

期門羽林皆屬光祿勳

服虔曰與期門下以微行後遂以名官師古曰羽林亦宿衛之官言其如羽之疾如林之多也一說羽所以為王者羽翼也

應劭曰天有羽林大將軍之星

閑駒 百官公卿表

太僕有龍馬閑駒橐泉駒駉承華五監長丞

如淳曰橐泉廐在橐泉宮下師古曰閑闌養馬之所也故曰閑駒駒駉出北海中其狀如馬駒徒高



反駭音塗

少府

百官公卿表

少府秦官掌山海池澤之稅以給共養

師古曰大司農供軍國之用少府以養天子也共  
居用反養弋亮反

執金吾

百官公卿表

師古曰金吾鳥名也主辟不祥天子出行職主先  
導以禦非常故執此鳥之象因以名官

水衡都尉

百官公卿表

卷三

張晏曰主都水及上林苑故曰水衡主諸官故曰  
都有卒徒武事故曰尉師古曰衡平也主平其稅

入

越騎

百官公卿表

越騎校尉掌越騎

如淳曰越人內附以為騎也師古曰宣紀言飲飛  
騎士胡越騎又此有胡騎校尉掌胡騎與越騎校

尉俱在八校尉數

戊己校尉

百官公卿表

師古曰甲乙丙丁庚辛壬癸皆有正位唯戊己寄治耳今所置戊己亦無常居故取戊己為名也有戊校尉有己校尉一說戊己居中鎮覆四方今所置校尉亦處西域之中撫諸國也

金璽盤綬

百官公卿表

晉灼曰盤草名也出琅邪平昌縣如艾可染綠因

以為綬名也師古曰璽之為言信也古者印璽通名今則尊卑有別漢舊儀云諸侯王黃金璽橐佗鈕文曰璽謂刻云某王之璽

徹侯

百官公卿表

秦制爵二十級以賞功勞徹侯最貴金印紫綬漢避武帝諱曰通侯

師古曰徹言其爵位上通於天子

丞相

百官公卿表

秦有左右丞相

荀悅曰秦本次國命卿二人是以置左右丞相無

三公官

五兵

吾丘壽王傳三十四

師古曰謂矛戟弓劍戈也

輸之司空

百官公卿表七上

宗正屬官有都司空令丞

如淳曰律司空主水及罪人賈誼曰輸之司空編

之徒官

司隸

百官公卿表

司隸校尉持節從中都官徒千二百人

師古曰以掌徒隸而巡察故云司隸中都官京師諸官府也

行在

武帝紀元狩六年

師古曰天子或在京師或出巡狩不可豫定故言

行在所耳不得亦謂京師為行在也

睢上

武帝紀元鼎四年

蘇林曰睢音誰如淳曰汾陰縣治睢之上后土祠  
在縣西汾在睢之北師古曰睢者以其形高起如  
人尻睢故以名云一說此臨汾水之上地本名鄧  
音與葵同彼鄉人呼葵音如誰故轉而為睢字故  
漢舊儀云葵上

渥洼馬

武帝紀

馬生渥洼水中

李斐曰南陽新野有暴利長當武帝時遭刑屯田  
燉煌界數於此水旁見羣野馬中有奇異者與凡  
馬來飲此水利長持勒鞞收得其馬獻之欲神異  
此馬云從水中出師古曰渥音握注於佳反

朝日夕月

武帝紀元鼎五年

師古曰春朝朝日秋暮夕月蓋常禮也郊泰時而  
揖日月此又別儀

先甲

武帝紀



詔曰辛卯夜若景光十有二明易曰先甲三日後甲三日朕飭躬齊戒丁酉拜況于郊

師古曰況賜也辛夜有光是先甲三日也丁日拜況是後甲三日也故詔引易文

舳艫

武帝紀元封五年

舳艫千里

李斐曰舳船後持柁處也艫船前頭刺櫂處也言其船多前後相銜千里不絕也舳音軸艫音盧

汗血馬

武帝紀太初四年西域大宛國傳六十六上

貳師將軍李廣利斬大宛王首獲汗血馬來作西極  
天馬之歌

應劭曰大宛舊有天馬種蹋石汗血汗從前髀出  
如血號一日千里師古曰蹋石者謂蹋石而有跡  
言其蹏堅利

孟康曰言大宛國有高山其上有馬不可得因取  
五色母馬置其下與集生駒皆汗血因號曰天馬

子云

褭蹏金

武帝紀太始二年

詔曰泰山見黃金宜改故名今更黃金為麟趾褭蹏以協瑞焉因以班賜諸侯王

師古曰武帝欲表祥瑞故普改鑄為麟足馬蹏之形以易舊法耳今人往往於地中得馬蹏金甚精好形製巧妙褭奴了反

小步馬

西域傳六十六上

烏耗國出小步馬

師古曰小細也細步言其能蹠足即今所謂百步  
千跡者也烏一加反耗直加反

纖嗇

孔氏傳六十一

師古曰纖細也與纖同嗇愛也細吝於財利也

晚節

石顯傳六十二

元帝晚節寢疾

師古曰晚節猶言末時也

計然

貨殖傳六十一

勾踐困於會稽之上迺用范蠡計然

孟康曰姓計名然越臣也師古曰據古今人表計然列在第四等計然一號計研故賓戲云研桑心計於無垠即謂此耳計然者濮上人也博學無所不通尤善計算嘗南遊越范蠡卑身事之其書則有萬物錄著五方所出皆直述之事見皇覽及晉中經簿又吳越春秋及越絕書並作計倪此則倪

研及然聲皆相近實一人耳

掌故

鼃錯傳十九

鼃錯以文學為太常掌故

應劭曰掌故六百石史主故事

狼顧

食貨志四上

失時不雨民且狼顧

李奇曰狼性怯走喜還顧言民見天不雨今亦恐也

服役

食貨志

今農夫五口之家其服役者不下二人

師古曰服事也給公事之役也

心計

食貨志四下

桑弘羊洛陽賈人之子以心計年十三侍中

師古曰心計不用籌算

齊民

食貨志

如淳曰齊等也無有貴賤謂之齊民若今言平民

矣

均輸 平準

食貨志

桑弘羊為治粟都尉領大農請置大農部丞數十人  
分主郡國置均輸鹽鐵官令遠方各以其物如異時  
商賈所轉販者為賦而相灌輸置平準於京師都受  
天下委輸大農諸官盡籠天下之貨物貴則賣之賤  
則買之如此富商大賈亡所牟大利則反本而萬物  
不得騰躍故曰平準



三木

司馬遷傳三十二

魏其衣赭闔三木

師古曰三木在頸及手足

闔茸

司馬遷傳

師古曰闔茸猥賤也闔下也茸細毛也言非豪傑也闔吐合反茸人勇反又賈誼傳注闔茸下材不肖之人也

青社

齊懷王傳三十三

皇帝使御史湯廟立子閔為齊王曰受茲青社

師古曰於廟授策也張晏曰王者以五色土為大社封四方諸侯各以其方色與之苴以白茅歸以

立社

宵人

廣陵厲王傳三十三

應劭曰無邇近小人也

劔論

司馬遷傳

司馬氏在趙者以傳劔論顯

服虔曰世善劍也師古曰劍論者能說劍術也論  
來頓反

圜牆

司馬遷傳

幽於圜牆之中

師古曰圜牆獄也周禮謂之圜土

少從

張騫傳三十一

師古曰漢時謂隨使而出外國者為少從總言其  
少年而從使也從材用反

進孰

張騫傳

大宛以西皆自恃遠尚驕恣漢使往既多其少從率進孰於天子言大宛有善馬

師古曰進孰者但空進成熟之言

積竹杖

昌邑王傳三十三

昌邑王徵詣長安為昭帝嗣到濟陽求長鳴雞道買

積竹杖

文潁曰合竹作杖也

仰藥

息夫躬傳十五

師古曰仰首而飲藥也

招權

李布傳七

辯士曹丘生數招權顧金錢事貴人趙談等

師古曰言招求貴人威權因以請託故得他人顧

金錢也

采金鄱水

地理志八上

孟康曰鄱陽鄱音婆師古曰采者取金之處

兩漢博聞卷三

欽定四庫全書

兩漢博聞卷四

宋 楊侃 輯

治行

曹參傳九

蕭何薨曹參聞之告舍人趣治行

師古曰舍人猶家人也一說私屬官主家事者也

趣讀曰促謂速也治行謂修行治裝也

獄市

曹參傳

曹參屬其後相曰以齊獄市為寄曰夫獄市者所以并容也今君擾之姦人安所容乎

孟康曰夫獄市者兼受善惡若窮極姦人姦人無所容竄久且為亂秦人極刑而天下畔孝武峻法而獄繁此其效也師古曰老子云我無為民自化我好靜民自正參欲以道化為本不欲擾其末也

事刃

蒯通傳十五

蒯通說范陽令曰足下殺人之父孤人之子慈父孝



子不敢事刃於公之腹者畏秦法也

李奇曰東方人以物市地中為事師古曰事音側  
吏反字本作傳

封人頸

王莽傳六十九中

王莽下書曰妄封人頸得錢者去

如淳曰權臣妄以法枉其人為僮僕封其頸以別  
之也得顧錢乃去封

阪上走丸

蒯通傳

蒯通曰范陽令先下而身富貴邊城必相率降如阪  
上走丸也

師古曰言乘勢便易

申子學

張歐傳十六

張歐孝文時以治刑名侍太子

師古曰劉向別錄云申子學號曰刑名刑名者循  
名以責實其尊君卑臣崇上抑下合於六經說者  
云刑刑家名名家即太史公所論六家之二也此

說非歐音驅

任俠

季布傳七

應劭曰任謂有堅完可任託以事也如淳曰相與  
信為任同是非為俠師古曰任謂任使其氣力俠  
之言挾也以權力俠輔人也任音人禁反俠音下  
頰反

冠玉

陳平傳十

或讒陳平曰平雖美丈夫如冠玉耳其中未必有也

孟康曰飾冠以玉光好外見中非所有也

端門

周勃傳十

師古曰端門殿之正門

從理入口

周勃傳

許負相周亞夫君後三歲而侯侯八歲為將相後九歲而餓死負指其口曰從理入口此餓死法也亞夫果封條侯為將軍拜太尉下廷尉不食五日死

師古曰從豎也音子容反

簿責

周勃傳

周亞夫下吏吏簿責亞夫

如淳曰簿問其辭情師古曰簿問者書之於簿一  
一問之也

四皓

王貢兩龔傳序四十二

漢興有東園公綺里季夏黃公角里先生

師古曰四皓稱號本起於此更無姓名可稱知此  
蓋隱居之人匿跡遠害不自標顯祕其氏族故史

傳無得而詳至於後代皇甫謐圈稱之徒及諸地理書說競為四人施安姓字自相錯互語又不經班氏不載於書諸家皆臆說今並棄略一無取焉

銜櫪

王吉傳四十二

司馬相如傳二十七下

師古曰銜馬銜也櫪車鉤心也張揖以櫪為馬之長銜非也櫪音其月反又注司馬相如諫獵書曰銜檠之變言馬銜或斷鉤心或出則致傾敗以傷人也

詐偽萌生

王吉傳

師古曰萌生言其爭出如草木之初生

翁主

王吉傳

高帝紀又注

漢家列侯尚公主諸侯則國人承翁主

晉灼曰娶天子女曰尚公主國人娶諸侯女曰承翁主尚承皆卑下之名也師古曰翁主者言父自

主婚也

王主

成帝紀建始元年

張晏曰王主王之女也師古曰王主即翁主也王  
自主婚故曰王主

軌躅

叙傳七上

伏周孔之軌躅

鄭氏曰躅迹也三輔謂牛蹄處為躅音丈欲反

偶人

公孫賀傳三十六

朱安世自獄中上書告公孫賀之子敬聲與陽石公  
主私通及使人巫祭祠詛上且上甘泉當馳道埋偶



人賀父子死獄中家族巫蠱之禍起自朱安世成於江充遂及公主皇后太子皆敗

師古曰刻木為人象人之形謂之偶人偶並也對也

左驗

楊惲傳三十六

張湯傳二十九

楊惲下廷尉廷尉于定國考問左驗明白

師古曰左證左也言當時在其左右見此事者也又張湯傳注李奇曰左證左也師古曰謂之左者

言除罪人正身之外又取其左右者考問也

城門候

蔡義傳三十六

師古曰門候主候時而開閉也

橋正

劉屈氂傳贊三十六

橋當世反諸正

師古曰正曲曰橋橋讀與矯同其字從手

小生

朱雲傳三十七

丞相薛宣留朱雲宿因謂曰且留我東閣可以觀四

方奇士雲曰小生迺欲相吏邪宣不敢復言

師古曰小生謂其新學後進言欲以我為吏乎

畔換

叙傳七十下

項氏畔換黜我巴漢

孟康曰畔反也換易也不用義帝要換易與高祖  
漢中也師古曰此說非也畔換強恣之貌猶言跋  
扈也詩大雅皇矣篇曰無然畔換

君侯

劉屈氂傳三十六

如淳曰漢儀注列侯為丞相稱君侯師古曰楊惲傳丘常謂惲為君侯是則通呼列侯之稱耳非必

丞相也

子絲

敘傳

子絲慷慨

師古曰爰盜字絲此加子者是嘉稱以偶句耳

行馳道

鮑宣傳四十二

成帝紀

丞相孔光四時行園陵官屬以令行馳道中

如淳曰令諸使有制得行馳道中者行旁道無得  
行中央三丈也

成帝紀云不敢絕馳道

應劭曰馳道天子所行道也若今之中道

丈人

疏廣傳四十一

師古曰丈人嚴莊之稱也故親而老者皆稱焉

鉦鼓

東方朔傳三十五 平帝紀元始二年

師古曰鉦鼓之教鉦鼓所以為進退士衆之節也

平帝紀遣執金吾候陳茂行邊兵假以鉦鼓

應劭曰將帥乃有鉦鼓今茂官輕兵少又但往諭  
曉之耳所以假鉦鼓者欲重其威也鉦者鐃也似  
鈴柄中上下通師古曰鉦音征鐃音女交反

亞將

灌嬰傳十一

虜亞將周蘭

師古曰亞次也

射鵰

李廣傳二十四

文穎曰鵬鳥也故使善射者射之師古曰鵬大鷖鳥也一名鷖黑色翮可以為箭羽音彫

蘧蔭

叙傳下

師古曰蘧蔭口柔觀人顏色而為辭佞也

閹尹

叙傳下

師古曰謂宦人為閹者言其精氣奄閉不泄也一日主奄閉門者尹正也

奪嫡

梅福傳三十七

諸侯奪宗聖庶奪適

如淳曰奪宗始封之君尊為諸侯則奪其舊為宗  
子之事也奪嫡文王舍伯邑考而立武王是也孔  
子雖庶可為殷後師古曰適讀曰嫡

祁連山

霍去病傳二十五

霍去病出北地遂深入至祁連山

師古曰祁連山即天山也匈奴呼天為祁連祁音  
上夷反



躡鞠

去病傳

去病在塞外卒乏糧而去病尚穿域躡鞠也

服虔曰穿地作鞠室也師古曰鞠以皮為之實以毛毳躡而戲也躡音徒臘反鞠音距六反

冢象祁連

去病傳

霍去病薨上悼之發屬國玄甲軍陳自長安至茂陵為冢象祁連山

師古曰在茂陵旁冢上有豎石冢前有石人馬者

是也

求雨

董仲舒二十六

董仲舒為江都相治國以春秋災異之變推陰陽所以錯行故求雨閉諸陽縱諸陰其止雨反是

師古曰謂若閉南門禁舉火及開北門水灑人之類是也

旬歲

翟方進傳五十四

翟方進為丞相司直旬歲間免兩司隸朝廷憚之

師古曰旬徧也滿也旬歲猶言滿歲也若十日之

一周

泉山

朱買臣傳三十四

東越王居保泉山

師古曰泉山即今泉州之山也保者保守之以自

固也

承明廬

嚴助傳三十四

賜會稽太守嚴助詔曰君厭承明之廬

張晏曰承明廬在石渠閣外直宿所止曰廬

威稜

李廣傳二十四

威稜憺乎鄰國

李奇曰神靈之威曰稜憺動也憺音徒濫反

鑿坏

揚雄傳五十七下

應劭曰鑿坏謂顏闔也魯君聞顏闔賢欲以為相使者往聘因鑿後垣而亡也坏音陪又音普回反

官騎

蘇武傳二十四

師古曰官騎宦者而為騎也

周陸

楊雄傳

以罔為周陸

李奇曰陸遮禽獸圍陳也陸音祛

旐旗

藝文志十

師古曰畫龜蛇曰旐鳥隼曰旗

諡

司馬相如傳二十七下

師古曰諡者行之迹也



文鷁

相如傳二十七

卷四

浮文鷁

張揖曰鷁水鳥也畫其象於船首淮南子曰龍舟鷁首天子之乘也

榜人

相如傳

榜人歌

張揖曰榜船也月令云命榜人榜人船長也主倡聲而歌者也榜音謗又方孟反

屬車

相如傳二十七下

應劭曰古者諸侯貳車九乘秦滅九國兼其車服  
漢依秦制故大駕屬車八十一乘師古曰屬者言  
相連續不絕也

反騷

廣騷

畔牢愁

揚雄傳五十七上

揚雄讀屈原離騷文未嘗不流涕以為君子遇不遇

命也何必湛身哉

湛讀曰沈謂投水而死

迺作書往往撫離騷

文而反之自岷山投書江流以弔屈原名曰反離騷

又旁離騷作重一篇名曰廣騷又旁惜誦以下至懷沙一卷名曰畔牢愁

師古曰旁依也音步浪反其下類此重音直用反李奇曰畔離也牢聊也與君相離愁而無聊也師古曰惜誦懷沙皆屈原所作九章中名也

品藻

揚雄傳五十七下

仲尼之後訖于漢道德顏閔肢肱蕭曹爰及名將尊卑之條稱述品藻誤淵騫



師古曰品藻者定其差品及文質

咫尺之書

韓信傳四

奉咫尺之書以使燕燕必不敢不聽

師古曰八寸曰咫尺尺者言其簡牘或長咫或長尺喻輕率也今俗言尺書或言尺牘蓋其遺語耳

枉矢

劉向傳六

枉矢夜光

應劭曰流星也其射如矢蛇行不正故曰枉矢流

以亂伐亂蘇林曰有聲為天狗無聲為枉矢

天狗

劉向傳

孝昭時有大星如月西行衆星隨之此為特異孝宣  
興起之表天狗夾漢而西

李奇曰流星也下墮地為天狗皆祲星

常伯

谷永傳五十五

戴金貂之飾執常伯之職

師古曰常伯侍中也伯長也常使長事者也一曰

常任使之人此為長也

法從

揚雄傳五十七上

趙昭儀方大幸每上甘泉常法從

師古曰法從者以言法當從耳非失禮一曰從法  
駕也

殊庭

郊祀志五下

師古曰殊庭蓬萊中仙人庭也

首級

衛青傳二十五



斬輕銳之卒捕伏聽者三千一十七級

張晏曰伏於隱處聽軍虛實師古曰本以斬敵一首拜爵一級故謂一首為一級因復名生獲一人為一級也秦法斬首一賜爵一級

裨王 衛青傳

漢兵圍右賢王右賢王驚夜逃潰圍北去輕騎校尉郭成等追數百里弗得得右賢裨王十餘人

師古曰裨王小王也若言裨將也

大黃

李廣傳二十四

李廣自以大黃射其裨將

服虔曰黃肩弩也孟康曰太公陷堅卻敵以大黃  
參連弩也晉灼曰黃肩即黃間也大黃其大者也  
師古曰服晉二說是也

從橫短長術

張湯傳二十九  
藝文志下

主父偃傳三十四上

邊通學短長官至濟南相

應劭曰短長術興於六國時長短其語隱謬用相

激怒也張晏曰蘇秦張儀之謀趣彼為短歸此為長戰國策名短長術也

主父偃學短長從橫術

藝文志云從橫家者流蓋出於行人之官孔子曰誦詩三百使於四方不能顯對雖多亦奚以為

師古曰謂人不達於事誦詩雖多亦無所用

三尺法

杜周傳三十

客謂廷尉杜周曰君為天下決平不循三尺法專以

人主意指為獄獄者固如是乎

孟康曰以三尺竹簡書法律也

箴石

藝文志十

師古曰箴所以刺病也石謂砭石即石箴也古者  
攻病則有砭今其術絕矣箴音之林反砭音彼廉  
反

裒然

董仲舒傳二十六

子大夫裒然為舉首

張晏曰褒進也為舉賢良之首也師古曰褒然盛服貌也

數奇

李廣傳二十四

大將軍陰受上指以為李廣數奇

孟康曰奇隻不耦也如淳曰數為匈奴所敗為奇不耦師古曰言廣命隻不耦合也孟說是矣數音所角反奇音居宜反

居無何

李廣傳



師古曰無何謂未多時也

烏號

司馬相如傳二十七上

郊祀志五上

左烏號之雕弓

應劭曰楚有柘桑烏栖其上支下著地不得飛欲

墮號呼故曰烏號

郊祀志黃帝采首山銅鑄鼎於荆山下鼎既成有龍垂胡髯下迎黃帝黃帝上騎羣臣後宮從上龍七十餘人龍迺上去餘小臣不得上迺悉持龍顙龍顙拔

墮墮黃帝之弓百姓仰望黃帝既上天乃抱其弓與  
龍顙號故後世名其處曰鼎湖其弓曰烏號於是天  
子曰嗟乎誠得如黃帝吾視去妻子如脫屣耳

師古曰屣小履脫屣者言其便易無所顧也

不世之功

後漢隗囂傳三附

足下將建伊呂之業弘不世之功

注云不世者言非世之所常有也

鼎鼎

鄧祀志

鼎及鼎

師古曰鼎絕大者謂之鼎圜弇上謂之鼎音乃  
代反鼎音茲

十二樓

郊祀志五下

方士有言黃帝時為五城十二樓以候神人名曰迎  
年

應劭曰昆侖玄圃五城十二樓仙人之所常居師  
古曰迎年若云祈年

箭服

相如傳二十七上

右夏服之勁箭

伏儼曰服盛箭器也夏后氏之良弓名繁弱其矢亦良即繁弱之箭服也師古曰箭服即今之步叉也

伏祠

郊祀志五上

秦德公作伏祠

孟康曰六月伏日也周時無至此乃有之師古曰

伏者謂陰氣將起迫於殘陽而未得升故為藏伏  
因名伏日也立秋之後以金代火金畏於火故至  
庚日必伏庚金也

梟鏡

郊祀志

人有言古天子常以春解祠祠黃帝用一梟破鏡

張晏曰黃帝五帝之首也春歲之始也梟惡逆之  
鳥方士虛誕云以歲始破除凶災令神仙之帝食  
惡逆之物使天下為逆者破滅訖竟無有遺育也

孟康曰梟鳥名食母破鏡獸名食父黃帝欲絕其類使百吏祠皆用之破鏡如羆而虎眼如淳曰漢使東郡送梟五月五日作梟羹以賜百官以其惡鳥故食之也師古曰解祠者謂祠祭以解罪求福

縉紳

郊祀志

李奇曰縉插笏於紳紳大帶也臣瓚曰縉赤白色紳大帶也左氏傳有縉雲氏師古曰李云縉插是也字本作搢插笏於大帶與革帶之間耳或作薦

紳者亦謂薦笏於紳帶之間其義同

縣蕞

叔孫通傳十三

叔孫通與其弟子百餘人為縣蕞野外

應劭曰立竹及茅索營之習禮儀其中也如淳曰  
謂以茅剪樹地為纂位尊卑之次也春秋傳曰置  
茅莖師古曰蕞與莖同並子悅反如說是也

九賓

叔孫通傳

大行設九賓臚句傳

蘇林曰上傳語告下為臚下告上為句也韋昭曰  
大行掌賓客之禮今之鴻臚也九賓則周禮九儀  
也謂公侯伯子男孤卿大夫士也

鷗夷

范蠡傳六十一

鄒陽傳二十一

師古曰范蠡自號鷗夷子皮者言若盛酒之鷗夷  
多所容受而可卷懷與時張弛也鷗夷皮之所為  
故曰子皮應劭曰吳王取馬革為鷗夷受伍子胥  
沉之江鷗夷楫形師古曰即今之盛酒鷗夷勝



傾蓋

鄒陽傳

鄒陽上梁孝王書語曰白頭如新傾蓋如故何則知與不知也

孟康曰初相識至白頭不相知文穎曰傾蓋猶交蓋駐車也

統斷幹

枚乘傳二十一

泰山之雷穿石單極之統斷幹

孟康曰西方人名屋梁為極單一也一梁謂井鹿

盧也言鹿盧為綆索久鏤斷井幹也晉灼曰統古  
綆字也單盡也盡極之綆斷幹幹井上四交之幹  
常為汲索所契傷也師古曰晉說近之幹者交木  
井上以為欄者也孟云鹿盧失其義矣統綆皆音  
鯁契皆刻也音口計反

文甲

東方朔傳三十五  
後漢王符傳三十九

後漢杜篤傳一百十

師古曰瑇瑁文甲也廣志曰瑇瑁形似龜出南海  
吳錄曰瑇瑁似龜而大

五諸侯

高帝紀二年

羽雖聞漢東既擊齊欲遂破之而後擊漢漢王以故得刼五諸侯兵

師古曰五諸侯者謂常山河南韓魏殷也此年十月常山王張耳降河南王申陽降韓王鄭昌降三月魏王豹降虜殷王卬

復除

高帝紀二年

蜀漢民給軍事勞苦復勿租稅二歲

師古曰復者除其賦役也音方目反

拔城

高帝紀秦二年

攻碭三日拔之

師古曰拔者克城邑而取之言若拔樹木并得其

根

穀嗛

郊祀志五下

師古曰嗛少意也言穀稼少嗛音苦簞反

急就篇

藝文志十

元帝時黃門令史游作急就篇成帝時李長作元尚篇皆蒼頡中正字也

八體

藝文志

韋昭曰八體一曰大篆二曰小篆三曰刻符四曰蟲書五曰摹印六曰署書七曰殳書八曰隸書

六體

藝文志

六體者古文奇字篆書隸書繆篆蟲書

師古曰古文謂孔子壁中書奇字即古文而異者

也篆書謂小篆蓋秦始皇使程邈所作也隸書亦

程邈所獻主於徒隸從簡易也

始造隸書起於官獄多事苟趨省易

施之於徒隸也繆篆謂其文屈曲纏繞所以摹印章也蟲

書謂為蟲鳥之形所以書幡信也

秦篆

藝文志

史籀篇者周時史官教學童書也與孔氏壁中古文

異體蒼頡七章者李斯所作也博學七章者胡毋敬

所作也文字多取史籀篇而篆體復頗異所謂秦篆

也

竹皮冠

高帝紀

應劭曰以竹始生皮作冠今鵲尾冠是也文穎曰高祖居貧志大取其約省與衆有異韋昭曰竹皮竹筠也今南夷取竹幼時續以為帳師古曰竹皮笋皮謂笋上所解之籜耳非竹筠也今人亦往往為笋皮巾古之遺制也

能

高帝紀

吾非敢自愛恐能薄

師古曰能謂材也能本獸名形似熊足似鹿為物  
堅中而強力故人謂有賢材者皆為能

擊筑

高帝紀十二年

後漢延篤傳五十四

高祖過沛留置酒沛宮酒酣上擊筑而歌

鄧展曰筑音竹應劭曰狀似琴而大頭安絃以竹  
擊之故名曰筑師古曰今筑形似瑟而細頸也後  
漢書注云說文曰筑五絃之樂沈約宋書曰筑不



知誰所造也史記唯云高漸離擊筑案今筑形似  
箏有項有柱史記荆軻至燕日與屠狗及高漸離  
擊筑荆軻和而歌於市中相樂已而相泣旁若無  
人

三雍

河間獻王傳二十三

河間獻王武帝時來朝獻雅樂對三雍宮

應劭曰辟雍明堂靈臺也雍和也言天地君臣人  
民皆和也又漢書音義曰皆叶天人雍和之氣為

之故謂三雍

蹲鴟

貨殖傳六十一

蜀卓氏曰吾聞嶧山之下沃壑下有跋鴟至死不飢  
師古曰蹲鴟謂芋也其根可食以充糧故無飢年  
華陽國志曰汶山郡都安縣有大芋如蹲鴟也

感槩

郭解傳六十二 季布傳七

郭解少時陰賊感槩

師古曰陰賊者陰懷賊害之意也感槩者感意氣

而立節槩也

季布傳贊曰婢妾賤人感槩而自殺非能勇也

五陵

原涉傳六十二

師古曰五陵謂長陵安陵陽陵茂陵平陵也班固  
西都賦曰南望杜霸北眺五陵是知霸陵杜陵非  
此五陵之數也而說者以為高祖以至茂陵為五  
陵失其大意

二府

劉向傳六

如淳曰二府謂丞相御史大夫府也亦曰兩府也

交戟

劉向傳

佞邪與賢臣並在交戟之內

師古曰交戟謂宿衛者

置醴

楚元王傳六

魯穆生受詩於浮丘伯楚元王好詩以穆生為中大  
夫穆生不嗜酒元王每置酒常為穆生設醴及王戊  
即位常設後忘設焉穆生退曰可以逝矣醴酒不設

王之意怠楚人將鉗我於市稱疾卧

師古曰醴甘酒也少麴多米一宿而熟不齊之

枕中書

劉向傳

宣帝興神仙方術之事而淮南有枕中鴻寶苑秘書  
言神仙使鬼物為金之術及鄒衍重道延命方世人  
莫見而劉更生父德武帝時治淮南獄得其書更生  
幼而讀誦以為奇獻之言黃金可成上令典尚方鑄  
作事費甚多方不驗

師古曰鴻寶苑秘書並道術篇名藏在枕中言常存錄之不漏泄也

印刂

韓信傳四

韓信曰項王使人有功當封爵刻印刂忍不能予

蘇林曰刂音刂角之刂刂與搏同手弄角訛不忍授也師古曰刂音五九反搏音大官反

馮軾

酈食其傳十三

酈食其馮軾下齊七十餘城

師古曰馮讀曰憑憑據也軾車前橫板隆起者也  
云憑軾者言但安坐乘車而游說不用兵衆

間路

韓信傳

黥布傳四

韓信欲東下井陘擊趙李左車說趙王曰願假臣等  
兵三萬人從間路絕其輜重

師古曰間路微路也

黥布先從間道破關下軍

師古曰間道微道也

葬驪山

劉向傳

秦始皇葬於驪山之阿下錮三泉上崇山墳高五十  
餘丈石椁為游館人膏為燈燭水銀為江海黃金為  
鳧雁珍寶之藏機械之變棺槨之麗宮館之盛不可  
勝原又多殺宮人生殮工匠計以萬數驪山之作未  
成而周章百萬之師至其下矣項籍燔其宮室往者  
咸見發掘其後牧兒亡羊羊入其鑿牧者持火照求  
羊失火燒其藏槨



師古曰石椁為游館者多累石於壙中以為離宮  
別館也孟康曰作機發木人之屬盡其巧變也晉  
灼曰始皇本紀命匠作機弩矢有所穿近輒射之  
又言工匠為機咸皆知之已下閉羨門皆殺工匠  
也師古曰不可勝原者言不能盡其本數也周章  
陳勝之將也往者皆發掘之以求財物也鑿謂所  
穿冢藏者音在到反

駙騎

惠帝紀

東方朔傳又注

應劭曰騶騶騎也師古曰騶本廐之馭騶也後人  
以為騎謂之騶騎

凌室

惠帝紀四年 武帝紀又注

師古曰凌室藏冰之室也

間者

文帝紀

師古曰間者猶言中間之時也

弋綈

文帝紀贊

文帝身衣弋綈

如淳曰弋皂也賈誼曰身衣皂綈師古曰弋黑色也綈厚繒音大奚反

太夫人

文帝紀七年

如淳曰列侯之妻稱夫人列侯死子復為列侯乃得稱太夫人子不為列侯不得稱也

醪

文帝紀後元年

師古曰醪汁滓酒也

指縱

蕭何傳九

功臣皆曰蕭何未有汗馬之勞居臣等上何也上曰  
諸君知獵乎夫獵追殺獸者狗也而發縱指示獸處  
者人也

師古曰發縱謂解紿而放之也指示者以手指示  
之俗言放狗縱音子用反而讀者乃為蹤蹟之蹤  
非也書本皆不為蹤字自有逐蹤之狗不待人發  
也

棧道

高帝紀元年

張良說漢王燒絕棧道

師古曰閣道也

鵠酒

齊悼惠王傳八

應劭曰鵠鳥黑身赤目食蝮蛇野葛以其羽畫酒  
中飲之立死

引强

周勃傳十

周勃材官引强

服虔曰能引强弓弩官也孟康曰如今挽强司馬

也師古曰強音其兩反

殿兵

周勃傳

周勃擊章邯車騎殿

師古曰殿填也謂鎮軍後以扞敵勃擊破章邯之  
殿兵也殿音丁見反

鈍如椎

周勃傳

周勃不好文學每召諸生說事東鄉坐責之趣為我  
語其椎少文如此

臣瓚曰今直言勿稱經也師古曰趣讀曰促謂今  
速言也服虔曰謂訥鈍也應劭曰今俗名拙語為  
椎儲師古曰椎謂撲鈍如椎也音直推反

酒家保

樂布傳七

樂布窮困賣庸於齊為酒家保

孟康曰酒家作保保庸也可保信故謂之保師古  
曰謂庸作受顧也為保謂保可任使

遮虜障

李陵傳二十四

師古曰障者塞上險要之處往往修築別置候望之人所以自障蔽而伺敵也遮虜障名也

穹廬

匈奴傳六十四上

師古曰穹廬旃帳也其形穹隆故曰穹廬

成蹊

李廣傳贊二十四

諺曰桃李不言下自成蹊

師古曰蹊謂徑道也言桃李以其華實之故非有所召呼而人爭歸趣來往不絕其下自然成徑以



喻人懷誠信之心故能潛有所感也

爰臂

李廣傳

李廣爰臂

如淳曰臂如猿臂通肩也

厥角顴首

諸侯王表二

王莽因母后之權漢諸侯王厥角顴首

應劭曰厥者頓也角者顴角也顴首首至地言王莽漸漬威福漢之王侯莫敢怨望皆頓角顴首至

地而上其壘綬也晉灼曰厥猶豎也叩頭則頷角豎齧與稽同

門牡飛

五行志七中之上

成帝元延元年長安章城門門牡自亡函谷關次門牡亦自亡

晉灼曰章城門者西出南頭第一門也師古曰牡所以下閉者也亦以鐵為之韋昭曰次門者函谷關邊小門也師古曰非行人所由蓋關司曹府所

在之門也

京房易傳曰飢而不損茲謂泰厥災水厥咎牡亡妖  
辭曰闕動牡飛辟為亡道臣為非厥咎亂臣謀篡故  
谷永對曰章城門通路寢之路函谷關距山東之險  
城門關守國之固固將去焉故牡飛也

九流

藝文志十

儒家者流出於司徒之官道家者流出於史官陰陽  
家者流出於羲和之官法家者流出於理官名家者

流出於禮官墨家者流出於清廟之守從橫家者流出於行人之官雜家者流出於議官農家者流出於農稷之官小說家者流出於稗官諸子十家其可觀者九家而已皆起於王道既微諸侯力政時君世主好惡殊方是以九家之術並出並作

師古曰稗音穉稗之稗稗官小官漢名臣奏唐林請省置吏公卿大夫至都官稗官各減什三是也

初用夏正 高里

武帝紀

太初元年冬十月行幸泰山十一月甲子朔旦冬至  
祀上帝于明堂十二月禋高里

應劭曰初用夏正以正月為歲首故改年為太初  
也高里者伏儼曰山名在泰山下師古曰此高字  
自作高下之高而死人之里謂之蒿里或呼為下  
里者也字則為蓬蒿之蒿或者既見太山神靈之  
府高里山又在其旁即誤以高里為蒿里混同一  
事文學之士共有此謬陸士衡尚不免況其餘乎

今流俗書本此高字有作蒿者妄加增耳

犇命

昭帝紀

始元元年益州牂柯等皆反遣水衡都尉呂破胡募吏民及發犍為蜀郡犇命擊益州大破之

應劭曰舊時郡國皆有材官騎士以赴急難今夷反常兵不足以討之故權選取精勇聞命奔走故謂之奔命師古曰犇古奔字耳犍音虔又鉅言反

封君

食貨志四下

師古曰封君受封邑者謂公主及列侯之屬也

即山鑄錢

食貨志

建元以來用度少縣官往往即多銅山而鑄錢

師古曰就多銅之山而鑄錢也

摩錢質取鎔

食貨志

姦或盜摩錢質而取鎔

臣瓚曰許慎云鎔銅屑也摩錢漫面以取其屑更以鑄錢西京黃圖叙曰民摩錢取屑是也師古曰

鎔音浴

皮幣

食貨志

有司言曰古者皮幣諸侯以聘享金有三等黃金為上白金為中赤金為下今半兩錢法重四銖而姦或盜摩錢質而取鎔錢益輕薄而物貴則遠方用幣煩費不省乃以白鹿皮方尺緣以績為皮幣直四十萬王侯宗室朝覲聘享必以皮幣薦璧然後得行又造銀錫白金以為天用莫如龍地用莫如馬人用莫如



龜故白金三品其一曰重八兩圜之其文龍名白撰直三千二曰以重差小方之其文馬直五百三曰復小楮之其文龜直三百令縣官銷半兩錢更鑄三銖錢重如其文盜鑄諸金錢罪皆死而吏民之犯者不可勝數

孟康曰白金銀也赤金丹陽銅也鄭氏曰半兩錢其文為半兩實重四銖也師古曰績繡也繪五采而為之如淳曰銀錫白金者雜鑄銀錫為白金也

晉灼曰以重差小之者以半斤之重差為三品則中品六兩下品四兩也師古曰橢音他果反橢圜而長之也

苑馬

景帝紀中六年

匈奴入鴈門至武泉入上郡取苑馬

如淳曰漢儀注太僕牧師諸苑三十六所分布北邊西邊以郎為苑監官奴婢三萬人養馬三十萬匹師古曰武泉雲中之縣也養鳥獸者通名為苑

故謂牧馬處為苑

商顏

溝洫志九

發卒萬人穿渠自徵引洛水至商顏下

師古曰徵音懲即今所謂澄城也商顏商山之顏也謂之顏者譬人之顏額也亦猶山領象人之頸領

黔首

藝文志十

後漢光武紀

師古曰秦謂人為黔首言其頭黑也又光武建武

五年注秦呼人為黔首謂奴為蒼頭以別於良人也

鵠冠

藝文志

後漢輿服志三十

師古曰以鵠鳥羽為冠

後漢志武冠加雙鵠尾豎左右為鵠冠五中郎將羽林左右監等皆冠鵠冠鵠者勇雉也其闔對一死乃止故趙武靈王以表武事奉施之焉

徐廣曰鵠似黑雉出於上黨荀綽晉百官表注曰

冠插兩鵑鷖鳥之暴疏者也每所櫻撮應爪催血  
天子武騎故以冠焉傳玄賦注曰羽騎騎者戴鵑

雉經

馮奉世傳贊四十九

申生雉經

師古曰國語云晉獻公黜太子申生乃雉經于新  
城之廟蓋為俛頸閉氣而死若雉之為

牢讓

師丹傳五十六

牢讓爵位

師古曰牢堅也

咀藥

王嘉傳五十六

王嘉引藥杯以擊地曰三公負國當伏刑都市何謂咀藥而死

師古曰咀嚼也

劔璣

王莽傳六十九上

王莽為新都侯就國孔休守新都相莽盡禮待之緣恩意進玉具寶劔欲以為好休不肯受莽因曰誠見

君面有癥美玉可滅癥欲獻其瑑即解其瑑休復辭  
莽曰君嫌其價邪遂椎碎之自裹以進休休乃受及  
莽徵去欲見休休稱疾不見

師古曰癥創痕也服虔曰瑑音衛蘇林曰劒鼻也  
師古曰瑑本作璫後傳寫訛也瑑音彫瑑字耳音  
篆說文云劒鼻玉也從玉璫音直例反

秒忽

叙傳七十下

元元本本數始於一產氣黃鍾造計秒忽

劉德曰秒禾芒也忽蛛蛛網細者也師古曰秒音  
眇其字從禾

置亭

馮奉世傳四十九

劉屈氂傳又注

師古曰置謂置驛之所也

離飢寒

蕭望之傳四十八

邊郡數被兵離飢寒

師古曰離遭也

金選之品

蕭望之傳



西羌反張敞上書言縣官穀度不足以振之

度徒各反願

令諸有辜非盜受財殺人及犯法不得赦者皆得以  
差入穀贖罪天子下其議兩府丞相御史以難問敞  
敞曰因此令贖其便明甚何化之所亂甫刑之罰小  
過赦薄罪贖有金選之品

師古曰呂侯為周穆王司寇作贖刑之法謂之呂  
刑後改為甫侯故又稱甫刑也應劭曰選音刷金  
銖兩名也師古曰音刷是也字本作錡錡即鍤也

其重十二銖二十五分銖之十三一曰重六兩呂  
刑曰墨辟疑赦其罰百鍰劓辟疑赦其罰惟倍剕  
辟疑赦其罰倍差宮辟疑赦其罰六百鍰大辟疑  
赦其罰千鍰是其品也

名數

孔光傳五十一

元帝賜霸第一區徙名數于長安

師古曰名數戶籍也

首鼠兩端

田蚡灌夫傳二十二

武安侯田蚡始未貴時往來侍酒於魏其侯竇嬰所  
跪起如子姓及蚡貴士吏趨勢利者皆去嬰而歸蚡  
蚡日益橫灌夫者父張孟嘗為灌嬰舍人得幸故蒙  
灌氏姓吳楚反夫父子俱有功武帝時夫位至太僕  
後蚡請嬰城南田嬰曰老僕雖棄將軍雖貴寧可以  
勢相奪乎不許夫聞怒蚡聞嬰夫怒不與田蚡亦怒  
兩人有隙蚡取燕王女為夫人嬰與夫俱往賀遂縛  
夫居室遣吏逐捕諸灌氏支屬皆得棄市罪嬰救夫

因言蚡短兩人廷辨之蚡罷朝召御史大夫韓安國  
怒曰與長孺共治一秃翁何為首鼠兩端嬰夫皆棄  
市

師古曰姓生也言同子禮若已所生也居室署名  
屬少府長孺安國字也張晏曰秃翁言嬰年老嗜  
酒頭秃言當共治一秃翁也服虔曰首鼠一前一  
却也

睢陽曲

梁孝王傳十七

梁孝王築東苑三百餘里廣睢陽城七十里

師古曰更廣大之也晉太康地記云城方十三里  
梁孝王築之鼓倡節杵而後下和之者稱睢陽曲  
今踵以為故今之樂家睢陽曲是其遺音



兩漢博聞卷四